



JOSY HELPS!

Nr. 2 | MÄERZ | 2018



De Logo vum JOSY HELPS!


Wësst dir wouhier de Logo vum JOSY HELPS! iwwerhaapt kënnt? Deen huet **d'Caroline Pavkovic** (3°C) entworfen. Virun 2 Joer huet d'Esther Herr e Concours organiséiert. Tëschent e puer Dosende Proposen gouf dem Caroline säin Entworf vun eisem Jury ausgewielt. Merci nach eemol, Caroline, fir deng flott Zeechnung!

WAT AN DER LËSCHT GELAF ASS ...

Ganz am Sënn vum JOSY HELPS! hunn d'Schülerinnen an d'Schüler vun der **Klass 4^eGPS** decidéiert, fir sech an hirer Fräizäit sozial z'engagéieren. Esou gi si eemol d'Woch an enger Grupp vu maximal 4 Schüler an de CIPA (Centre d'Intégration pour Personnes Âgées) op Mamer, fir e puer Stonne mat den eelere Leit Zäit ze verbréngen. Um Programm stinn hei Gesellschaftsspiller oder Trëppeltouren am Park niewendrun. Mir felicitéieren deene Jonke fir dës flott Initiative an hoffen, datt den Austausch tëscht Generatiounen hinne vill wäertvoll Erfahrung schenkt. Och e grouse Merci un hir Regente Tania Simon, déi dëse Projet mat op d'Bee gestallt huet.



An der kaler Zäit kuerz viru Chrëschttag war et en Uleies vun de Schülerinnen a Schüler vun der **Klass 5°CM2**, de Sans-abrisen an der Stad Lëtzebuerg eng kleng Freed ze maachen. Esou hu si am Virfeld eng Hellewull Mutzen, Schaler, Jacketten an Decke gesammelt. Den Dag selwer hu si frësch Tëi gekacht an sech dono am schloe Reen schwéierbelueden op de Wee gemaach Richtung Stater Gare a Bouneweg. Villes gouf ausgedeelt a verschenkt. Leider gouf d'Aktioun net vu jidderengem wëllkomm geheescht. De Rescht gouf dunn un d'Stroossener Scouten iwwerginn, déi d'Kleeder un d'Affer vun de schwéiere Bëschbränn a Portugal weidergeleet hunn. Hinnen an der Madamm Aach dofir e grouse Merci. Den engagéierte Schüler wënsche mir, datt sinn och weiderhin sou flott Projeten op d'Bee stellen.



D'Schüler vun der **4°GPS** gi mam gudden Beispill vir a setzen sech och bei eis am Mamer Lycée dofir an, datt d'Zesummeliewe besser funktionéiert. Esou hunn 8 Jonker aus dëser Klass decidéiert e Parrainage vu Jonken aus der ACCU 1 Klass z'iwwerhuelen, fir datt si eis Sprooch méi séier léieren a sech méi séier bei ons wuelfillen. Super Initiative!

De **Projet JC (Josy Charger)** hëlt Form un. D'Maquett ass fäerdeg an d'Aarbechten un der Naturgetreier Statioun gi virun. D'Schüler vun der 1re an 2e si mat ganzem Asaz dobäi a "schräineren" fläisseg a mat Spaass um Projet. Zäit vergeet ëmmer esou séier, an awer gesäit een, no all Cours, wéi de Projet wiisst. An dat ass dat schéinst um Handwerk wann een zréck kucke kann wat ee vollbruecht huet: eppes Eenzegaarteges!

Och d'Schüler vun der 2e an 3e aus dem Grupp Kommunikatioun vun der Mme Herr si mat vollem Asaz dobäi, a komme reegelméisseg an den Atelier kucken a filmen d'Fortschrëtter. Déi gesammelt Informatiounen setzen si da gekonnt zesummen op hire **Blog <https://libmsaveourplanet.wordpress.com>** a presentéieren dem breeden Public dobaussen déi flott Aarbechten. Gitt roueg emol kucken...

Dem **JOSY HELPS!** - Team wor et vun Ufank u wichtig, d'Schülerinnen an d'Schüler am Mamer Lycée méi ze responsabiliséieren. Esou hu mir ugefaangen, d'Roll vum **Klassespriecher** méi erauszehiewen a si méi mat anzebannen. Fir hir Roll kënnen uerdentlech z'erfëllen, bidde mir hinnen am Schouljoer e puer Workshops un. Den éischte Workshop huet e Mëttwoch, den 18. Februar stattfonnt. BEE SECURE koum bei eis an d'Schoul an huet de Jonken Tipps ginn, wat si maache kënnen, wa si Zeie vu Cybermobbing ginn. D'Klassespriecher wëssen no dësem Atelier Cybermobbing ze detektéieren an z'intervenéieren, wann ee vun hire Komeroden an dësem Fall wier.

De 14.12. hate mir am Kader vun eiser traditioneller Journée pédagogique en "**Atelier de réflexion sur le développement durable**" organiséiert. Zil war et virun allem erauszefannen, wéi een aus dem LJBM laangfristeg eng "école durable" kéint maachen. D'Iddi vun der "Nohalteger Entwécklung" ass esou vaste, datt een onméiglech all déi betreffen Domainer ofdecke kann, dofir wollte mir wëssen, wat am LJBM wierklech erwünscht ass, wat speziell bei eis am Gebai gebraucht gëtt a wat dovunner iwwerhaapt méiglech ass. Ganz vill héich motivéiert Enseignanten hate sech an den Atelier ageschriwwen an et koumen e ganze Koup wierklech interessant Iddien op den Dësch, déi mir vum JOSY HELPS! an deene nächsten 3 Joren probéieren ëmzesetzen.

Mir sinn dovunner iwwerzeegt, datt mir eis Schüler am beschte sensibiliséiere kënnen, wa mir net nëmmen sporadesch Atelierer a Visitten organiséieren, mee d'Bildung zur Nohalteger Entwécklung systematesch an den Unterrecht integréieren. An deem Sënn hu mir op OneDrive e Grupp "BNE" gegrënnt, an deem mir Fachliteratur, Aarbechtsblieder a weider Dokumenter zum Thema mateneen deelen. Hei ka jiddereen sech dat eroflueden a u säi Cours upassen, wat him zouseet. Mir sinn natierlech frou fir all Dokumenter an och Fotoe vun ausgeféierte Projeten déi dropgesat ginn, fir datt eist Angebot ëmmer méi grouss a villfälteg gëtt. Waart dir am Dezember net beim "Atelier de réflexion" mat dobäi, wëllt awer och an dës Grupp opgeholl ginn, da mellt iech w.e.g. op pe@ljbm.lu.

PS: Verschidde Bicher a Filmer zum Thema "Nohalteger Entwécklung" fannt dir och an eiser klenger Bibliothéik am B215 (direkt riets am Schaf). Do hänkt och eng Lëscht, wou dir kënt androen, wann dir eppes ausléinen oder fir e bestëmmten Dag reservéiere wëllt.



Vum 8. bis den 19. Januar hat d'Michèle Manderscheid d'**Expo ANTIGASPI** vum Ministère de l'Agriculture, de la Viticulture et de la Protection des consommateurs bei eis an d'Schoul bestallt. Etlech Klasse waren dës flott gestalten Ausstellung mat hire Proffe besichen an hunn dobäi op eng ganz interessant Manéier gewise krut, wéi schlëmm d'Liewensmëttelverschwendung an der Welt an hei zu Lëtzebuerg wierklech ass, wéi eng wirtschaftlech an ökologesch Konsequenzen dëst mat sech bréngt, a wéi ee sech beim Akafen, Frigo araumen, kachen a konsuméiere kéint méi responsabel verhale fir de Gaspillage ze verréngeren.

Am Lycée Josy Barthel Mamer ass ee vun de groussen Ziler vum aktuellen *projet d'établissement* JOSY HELPS! sech ëm humanitär Hëllef ze këmmere, net nëmmen am Ausland, mee och zu Lëtzebuerg. Zu dësem Zweck hat de schoulinternen **Workshop Marrakesch**, an zesummenaarbecht mam Schüler- a Elterecomité an e puer Enseignanten, d'lescht Joer een *Dîner de Nouvel An* mat franséischer Kichen organiséiert, bei deem vill Suen zesummekoumen. De schéine Betrag vun 3650€ ass un de Fonds de Solidarité gespent ginn. Ee klengen Deel vum Erléis ass bei d'Finanzéierung vun enger Rees op Marrakesch bäigeluecht ginn, fir déi Schülerinnen a Schüler aus dem LJBM ze belounen, déi vill Aarbecht an Zäit an d'Organisatioun vun engem ganz besonnesche kulinarischen Owend investéiert haten.

WAT AN NÄCHSTER ZÄIT USTEET ...

Och dëst Schouljoer organiséiert de Lycée Josy Barthel Mamer erëm am Kader vum Schoulprojet JOSY HELPS! eng "**Journée de la solidarité**", en Dënschdeg de 27. Mäerz vun 8h15-11h50. Fir déi zweete Kéier hu mir ONGen an ASBLen aus den ënnerschiddlechste Beräicher bei eis an d'Schoul ageluede fir eise Schüler hir Aarbecht virzestellen, si ze informéieren an ze sensibiliséieren. Bis elo hu schonn eng ronn 30 Organisatiounen zougesot (dorënner Greenpeace, Médecins sans frontières, Move a vill anerer). Nieft e ganze Koup vun Atelieren a Konferenzen, wäerte mir och dëst Joer nees en "Charity Run" an e "Faire Breakfast" ubidden. Weider Informatiounen zum Oflaf vum Dag kommen nach no.

Weider Evenementer:

12.3.-16.3.: Aktioun "Josy finds the waste"

18.4.: Cérémonie de la Remise des Insignes vum Mérite Jeunesse

19.4.: Témoignage vum M. Pol Sobol, Zäitzeien, am Kader vun der Ausstellung "Andréck vun Auschwitz" (entworf vun eise Schüler, déi am November mat op Auschwitz waren)

Wann der Froen hutt, sou zéckt net a mellt iech bei ons ënnert der Email-Adress: pe@ljbm.lu

Äert JOSY HELPS! Team: Sandra Fratini, Esther Herr, Roland Herrmann, Gilles Klein, Manuela Vaccher, Jessica Wilmes.